

Nunatsinni nioqqutissat akiisa OECD-imi inuussutissat ulluinnarni atorneqakkajuttut naligninnaasumik akiisa agguaqatigiisinnerinut naleqqiullugu nunatsinni qaffasippallaarujussuarnerisa sumik tunngaveqarnersut misissueqqullugit naalackersuisut peqquneqarnissaannik Inatsisartut aalajangiiffigisassaattut siunnersuut. Misissuineq UKA2020-imi nallertinnagu inatsisartunut saqqummiunneqassaaq.

Siumut Inatsisartuni gruppiannit saqqummiunneqartog

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Henrik Fleischer, Siumut, Siulittaasoq

Inatsisartunut ilaasortaq Múte Bourup Egede, Inuit Ataqtigiit, Siulittaasup tullia

Inatsisartunut ilaasortaq Aqqalu Jerimiassen, Atassut

Inatsisartunut ilaasortaq Hermann Berthelsen, Siumut

Inatsisartunut ilaasortaq Randi Vestergaard Evaldsen, Demokraatit

Inatsisartunut ilaasortaq Peter Olsen, Inuit Ataqtigiit

Inatsisartunut ilaasortaq Tillie Martinussen, Suleqatigiissitsisut

Siunnersuutip imarisai siunertaalu

Kalaallit Nunaanni nioqqutissat ulluinnarni atorneqarnerusut akisunerinut pissutaasunik misissueqqullugit Naalackersuisut pisussaaffilerneqarnissaat siunnersuuteqartunit aalajangiiffigisassatut siunnersuutikkut kissaatigineqarpoq. Nioqqutissat ulluinnarni atorneqarnerusut akiisa qanoq appartinneqarsinnaanerannut kaammattuutinik periusissanillu misissuineq imaqassaaq.

Siunnersuutip Inatsisartuni siullermeerneqarnera

Siunnersuut tamanit taperserneqarpoq. Inuit Ataqtigiit oqaluuserinninnermi aalajangiiffigisassatut siunnersuummut allannguutissatut siunnersuummik saqqummiussipput. Siunnersuut qinigaaffimmi kingullermi siunnersuummik (UKA2017/71) annertuutigut uteqqiinerusoq oqaluuserinninnermi oqaatigineqarpoq.

Aammattaaq oqaatigineqarpoq ulluinnarni atugaanerusut akiisa qaffasinnerannut pissutaasut assigiinngitsorpasuuinnaasut, tamatumani nunap immikkoortuinut tamanut assartuussisarneq, assartuussisarnikkut attaveqarneq, nioqqutissat ulluinnarni atugaanerusut akitsuusersugaanerat kiisalu iluanaaruteqartarnermut inatsiseqannginnera ilanngullugit. Iluanaaruteqartarnermut inatsisaasinnaasoq pillugu oqallisiginninnermi "Pilersuisumut tunngatillugu pisiassat iluanaarutissatut qanoq akitsorneqarsinnaatiginerannik killiliisimallutik" Inuussutissarsiornermut Nukissiuteqarnermut Ilisimatusarnermullu Naalackersuisumit paasissutissiissutigineqarpoq.

Oqallisiginninnermi aamma sumiiffinni minnerusuni quersuaqarnikkut amigaateqarneq ajornartorsiutaasutut oqaatigineqarpoq.

Qanoq Inuussutissaqarnermut Aqqutisoqarfik Danmarkimit tigusinnaanerlutigu isumaliutigineqarsinnaasoq siunnersuutigineqarpoq. Aammattaaq niueqateqarnissamut killilersugaanngitsumillu niueqatigiinnermut isumaqatigiissuteqarfiginninnissamut periarfissat misissorneqarsinnaanerannik kiisalu nioqqutissat sananeqaataannik nassuiaatinik allagartalersuisarnermut maleruagassat naleqqussarneqarsinnaanerannik siunnersuuteqartoqarpoq.

Oqallisiginninnermi ilaatigut sumi najugaqaraluaaraanni akit assigiilersinneqarnissaannik kissaatiginnilluni, nunallu immikkoortuisa tamarmik misissuinnermut pitsaasumik ilanngutsinneqarnissaannik pingaartitsilluni oqaaseqartoqarpoq. Naalackersuisut akissuteqaamminni oqaatigaat misissuinnermut atatillugu nunami namminermi akit assigiinngissutigisinnaasaat misissoqqissaarneqassasoq.

Inuit Ataqtigiinnit allannguutissatut siunnersuut

Siunnersuummik siullermeerinninnermi Kalaallit Nunaanni iluanaarutiginnittarnermut inatsiseqannginnera partiinit arlaqartunit uparuarneqarpoq, tamatumalu misissuinnermut ilanngunneqarnissaata pisariaqarnera.

Allannguutissatut siunnersuut una Inuit Ataqtigiinnit saqqummiunneqarpoq:

"Nunatsinni nioqqutissat akiisa OECD-imi inuussutissat ulluinnarni atorneqakkajuttut naliginnaasumik akiisa agguaqatigiisinnerinut naleqqiullugu nunatsinni qaffasippallaarujussuarnerisa sumik tunngaveqarnerisut misissueqqullugit naalackersuisut peqquneqarnissaannik Inatsisartut aalajangiiffigisassaattut siunnersuut. Nioqqutissap qanoq annertutigisumik

iluanaarutigineqarsinnaanera pillugu inatsimmik pilersitsineq, nioqqutissat akiinik apparsaaniarnermi sakkussatsialattut atorneqarsinnaanersoq missuinermi ilanngullugu isummerfigineqassaaq. Misissuineq UKA2020imi nallertinnagu inatsisartunut saqqummiunneqassaaq.”

Ataatsimiititaliap siunnersuummik suliarinninnera

Aalajangiiffigisassatut siunnersuut ajornartorsiummik pingaaruteqartumik qaqitsisutut ataatsimiititaliamit nalilerneqarpoq. Kalaallit Nunaanni nioqqutissat ulluinnarni atorneqarnerusut nunanut allanut amerlasuunut sanilliullugit akisunerupput. Taamaammat – tamanna ajornanngippat – akit appartinnissaat siunertaralugu tamatumunnga pissutaasunik misissuinissaq ataatsimiititaliamit tunngavissaqarsorineqarpoq.

Danskit akit iluanaaruteqartarnerlu pillugit inatsisaat (1971-imeersoq) 1988-imi unammilleqatigiinnermut inatsimmik taarserneqarluni atorunnaarsinneqarsimammat ataatsimiititaliamit maluginiarneqarpoq. Unammilleqatigiinnermut inatsit Kalaallit Nunaanni atuuttoq danskit inatsisaat assigalugu malittarisassanik arlalinnik Akit Iluanaaruteqartarnermullu Inatsisaasimasumeersunik, unammilleqatigiinnermik sunniuteqarluartumik qulakkeerisussanik imaqarpoq, tamatumani aamma ilaatigut pisariaqarfiatigut akinik iluanaarutinillu annerpaaffissaliisunik.

Taamaammat ataatsimiititaliaq isumaqarpoq iluanaaruteqartarnermut inatsimmik immikkut suliaqarnermut taarsiullugu unammilleqatigiinnermut inatsimmi pioreersumi, unammilleqatigiinnermik sunniutilimmik qulakkeerinissaq nalinginnaasorlu sinnerlugu iluanaaruteqartarnermik pinaveersaartitsinissaq siunertaralugit ullutsinnut tulluurtunik naammattumillu sunniuteqartunik malittarisassaqaqarnersoq misissussallugu pissusissamisoorinnaasoq. Malittarisassat atuuttut naammattumik sunniuteqanngitsut paasinarsissappat, tamannalu unammilleqatigiinnermut inatsimmik allannguinnermut taarsiullugu immikkut iluanaaruteqartarnermut inatsisiliornikkut pitsaanerpaamik iluarsivigineqarsinnaasutut Naalakkersuisunit nalilerneqassappat, tamanna ataatsimiititaliap allannguutissatut siunnersuutaanit mattunneqanngilaq.

Ataatsimiititaliaq allannguutissatut siunnersuummik uuminnga saqqummiussivoq:

Nunatsinni nioqqutissat akiisa OECD-imi inuussutissat ulluinnarni atorneqakkajuttut nalinginnaasumik akiisa agguaqatigiissinnerinut naleqqiullugu qaffasippallaarujussuarnerisa sumik tunngaveqarneranik misissueqqullugit naalakkersuisut peqquneqarnissaannik Inatsisartut aalajangiiffigisassaattut siunnersuut. Nioqqutissat nunatsinni ulluinnarni atorneqakkajuttut akiinik appartitsineq qanoq iliorluni siuarsarneqarsinnaanersoq pillugu kaammattuutunik periusissanillu kiisalu unammilleqatigiinnermik sunniutilimmik qulakkeerinninnissaq siunertaralugu

nalinginnaasorlu sinnerlugu iluanaaruteqartoqartarneranik pinaveersaartitsiniarluni unammilleqatigiinnermut inatsimmi malittarisassat maanna atuuttut qanoq ullutsinnut tulluartiginerannik nalilersuinermik misissuineq imaqassaaq. Misissuinerup inerneru UKA2020-imi nallertinnagu inatsisartunut saqqummiunneqassapput.

Aammattaaq qanoq assartuussisarnermut aningaasartuutitut tapiiffiqatigiittarnermullu tunngassutillit misissuinermut ilanngunneqarnissaasa allannguutissatut siunnersuummut toqqaannartumik ilanngunneqarsinnaanerata ataatsimiititaliamit oqallisigineqarpoq. Akilli qaffasissumik inissisimanerat pillugu misissuinermut sammisat taakku ilanngunneqarnissaat ataatsimiititaliamit pissusissamisoortutut nalilerneqarpoq, taamaalillutillu Naalakkersuisut isumaliutiginninnerannut ilanngunneqarnissaat naatsorsuutigineqarluni.

Naggasiutigalugu oqaatigineqassaaq ataatsimiititaliamit paasineqarmat inuussutissanik allagartalersuisarneq pillugu apeqqut imm. 103-p ataani immikkut sammineqartoq

Siunnersuutip aningaasaqarnikkut kingunissai

Siunnersuuteqartut aalajangiiffigisassatut siunnersuumminni siunnersuutip aningaasaqarnikkut kingunissai allaaserivaat. Tamatumunnga oqaaseqaateqarnissaminut ataatsimiititaliaq tunngavissaqarsorinngilaq.

Ataatsimiititaliap inassuteqaatai

Ataatsimiititaliap **isumaqatigiittup Inuussutissarsiornermut Aatsitassanullu Ataatsimiititaliap** allannguutissatut siunnersuutaata **akuersissutigineqarnissaa** inassutigaa.

Ataatsimiititaliap taama oqaaseqaateqarluni isumaliutissiisummilu allassimasutut paasinnilluni siunnersuut aappasaaniigassanngortippaa.



Henrik Fleischer
Siulittaasoq



Múte B. Egede
Siulittaasup tullia




Hermann Berthelsen




Aqqalu Jerimiassen



Randi V. Evaldsen



Peter Olsen



Tiffie Martinussen